

2 Samuel

Davidhuunoa Cununi Cuscan

Saúl naano Amalecita pushcon
Davidqui chanini

1 ¹Ascan Saúl naano David fu rafuafu futan Amalecitafo rutuquin anaititan pushu rasi Siclag ano nasofuracani. Nanno osha rafuyonifo. ²Ascan iyoconaino nocofunu Saúl nanoashu David icano noconi. Ahuun sahuutifo fashnu fashnuatan ahun mapoqui mai mapo ocani. Ascaquifin ato ismaniquin Israelifo shinancoinquin. Davidqui nocotan maiqui fuoshonpacacahuani David niaifo shara ismashquin. ³Ascaiton David yocani isca huaquin, —¿Raniashu min oamun? —ishon yocaiton.

—Un Israeli ranushumuafo icanoashu nuno ichoaran, —ishon cumani.

⁴—Israeli ahun ranushumuafoan ahua finoanmainquin ua yoihuun, —ishon David yocaiton.

—Filisteofoan ato rutuaino Israelifo ichonifo. Ichapacoinfo man naashu pacunifo. Niaifo Saúl yafi ahun facu Jonatán arifi man naaforan, —ishon yoini.

⁵Ascaiton David nan pushco yocani isca huaquin, —¿Ahuuscashon min tapiamun Saúl yafi furu Jonatán naa? —ishon David yocaiton. ⁶Pushcopan cumani,

—Unfin nanno machi Gilboa anoshon oian Saúl ahun ashin cocusamushon Filisteofo casho cuscan taramutiyafo non caballofoyari aqui noco cuanaifoan. ⁷Saúl ifiacucahuan ua fuchishon ua cuna. Ascashon ua yoia isca huaquin, “Uqui ohuu,” ua hua. Ascan un cuma, “¿Un mia ahua huashotiromun?” huaiton. ⁸“¿Min tsoamun?” ishon ua yocaiton. “Unfin Amalecitaquin,” ishon un cuma. ⁹“Mun omitsiscafiaicai un nataima. Ascacun ua rutuhuun un nariscanon,” ishon ua yoia. ¹⁰Mun tapifaita chai nipatiroma. Ascan ua yonua cuscan mun rutua. Ascan ahun niaifo maiti non ahun muupi un fiia mia fushoshquin min uhuun niaiforan, —ishon Amalecita pushco yoini.

¹¹Nicacashon David a fu icafoanri fasi shinancaquin aton sahuutifo fashnu fashnuanifo. ¹²Ascan fasi Saúl yafi furu Jonatán non Israeli ranushumua futsafo nanfo nocon Ifo Diosina. Filisteofoan nantifi Israelifo rutunifo David futa a fu icafo nica manocani fasi uainifo shafatan piqui tununifo. ¹³Chipo David nan pushco aqui Saulhuunoa chanini yoca isca —¿Min tsoan yoramun? —ishon yocaiton. —Uncai Israelima. Unfin Amalecitafishu min mai ano icaquin, —ishon cumaiton.

¹⁴—¿Ahuuscai ratutama nan nocon Ifo Diosin catoan niaifo inon min rutua?

—ishon David yoini. ¹⁵Ascan David ahuun yora futsa cunashon yonoa isca huaquin, —Na pushco rutuhuun, —ishon yononi. Ascaiton nopun rutuni. ¹⁶Rutuataima David pushco Amalecita yoini isca huaquin, —Min chaca hua cuscahuunoa man min nai. Nan min tsainhuunshofin non mia rutuicai. Minfin noco tapimaquin isca hua, “Unfin nocon Ifo Diosin catoan mun rutua,” ishon min noco yoia. Ascan natian man min nairan, —ishon David yoini.

—David, min noco niaiforan, —ishon
Judá ahuun funafoan yoinifo

2 ¹Ascan chipo David nocon Ifo Diosi yocani isca huaquin,
—¿Uhuun Ifon, un pushu rasi Judá mai ano caashquimun nanno ishquin?
—ishon yocaiton.
—Ai. Nanno catahuun, —ishon nocon Ifo Diosin cumani.
—¿Rato pushu rasi ano un caimun?
—ishon yocaiton.
—Hebrón ano catahuun, —ishon Ifo Diosin David cumani.

Nantifi Israeli mai ano icafo non Judá ano icafori David aton niaifo ini

5 ¹Ascan chipo nantifi Israeli mani futsafo anoashu Hebrón pushu rasi ano Davidqui fucashon yoinifo isca huaquin, —Nonfin min imiquin. Non min yorafo. ²Saúl noco niaifo iyopaonifiashon min nocon ranushumuafo iyoní noco numanon. Nocon Ifo Diosin mia yoini isca huaquin, “Min uhuun yora Israelifo cushushquin aton niaifo min iishquaiin,” mia yoiniran, —ishon Israelifoan David yoinifo.

³Asca huacatan nantifi Israeli niaifo patasharinofo Hebrón ano Davidqui funifo. Ascan David ato futan nocon Ifo

Diosi ointaifin nannorifosi yoinansharanifo. Ascafoan David ahuun mapoqui shuni ocatan yoinifo, —Natian min nantifi Israelifo nocon niaiforan, —ishon yoinifo. ⁴Ascan David treinta fariaitian Israelifo aton niaifo iqui tauni. Aton niaifo cuarenta fariya ini. ⁵Tau huaquin siete fari non seis oshuri pushu rasi Hebrón ano niaifo ini. Ascan chipo pushu rasi Jerusalén ano nantifi Israeli icano yafi Judá icanoafori aton niaifo treinta tres fari David ini.

David yora futsafo Jebuseofo Jerusalén pushu rasi anoshon potani Israelifona inon

⁶Ascan chipo David Israeli ranushumuafo iyoní pushu rasi ahuun anu Jerusalén anoshon Jebuseofo potanonfo. Ascan Jebuseofoan David yoini isca huaquin, —Min noco Jerusalén pushu rasi muran iquipacunacama. Fushofo non chatofoanri mia nituhuatirofo min nuno iquinonma, —ishon yoinifo. —David nocon pushu rasi muran iquitiromaran, —ishon shinannifo. ⁷Ascafiaino David ahuun ranushumuafoya Jerusalén pushu rasi muran iquini. Ahuun anu futsa Sión. Iquifainnaifoan Jebuseofo ato potani Israelifona inon. Chipó nan pushu rasi anu futsa tuqui huani Davidnaran ishon anunifo. ⁸Jerusalén iquiataima nan tsain chaca Jebuseofoan David fomani. Nicashon David ahuun ranushumuafo yoini isca huaquin, —Ato quini unu afain muran iquiyotacahuun nan Jebuseo fushofo non chatofo rutunon. Un ato fasi noिकासmaicai, —ishon ato yoini. Asca tau huaquin yoiyomisi cuscan, —Fushofo non chatofo pushu muran iquitiromaran, —ishon cashucaquin yoisimifo. ⁹Ascan nan Jerusalén pushu rasi ano David iquini nanno ahuun pushu huaashquin.

Anu futsa caquin pushu rasi Davidnaran ishon anunifo. Ascan nanno David cunu cuyacoin tarati huayacuni nan pushu rasi muran noिकासमाifo iquinonfoma.

Niaifoan ahuun anu Hiram ahuun mai arishon nocofunifo Davidqui nichini

¹⁰Ascan nocon Ifo Diosin David fu imisi ahuunshon futsafo iquiquin finacaimisi. A tsoan finontiroma ipaoni. ¹¹Ascan ahuunoa nicaino Tirofo mai anoa aton niaifoan ahuun anu Hiram nocofunifo Davidqui nichishoni tsain shara yoinonfo. Nantianri yonomisifori nichishoni a futan pushu huashononfo. Ihui cosha ichapa fomafain ihui yonomisifo aqui nichifain toquiri uhuapacoin ahuun yonomisifori nichishoni David pushu uhuapa ashononfo. ¹²Ascan David oianno niaifo futsa shara huashoaiton oinquin tapini nocon Ifo Diosin yonoa cuscan nantifi manifoannafoan Israelihuunoa nicanifo. Futsafoan shinanfo Israeli caifofo mutsisipacoincun. David tapini nocon Ifo Diosin Israelifo noicoinquin aton niaifo imani.

David ahuun facu ranan ichapacoin ini

¹³Ascan David Hebrón anoashu Jerusalén ano shucuaitian ahuin ichapafo fini. Ascan furonanfacu non ainfacu ichapaya ipaoni. ¹⁴Ahuun furufo Jerusalén anoashu cainnifo aton anufo Samúa non Sobab non Natán non Salomón non ¹⁵Ibhar non Elisúa non Nefeg non Jafía non ¹⁶Elisama non Eliadá non Elifelet nanti ini.

David Filisteofo finonni

¹⁷Nocon Ifo Diosin David catoan Israelifo aton niaifo inon Filisteofoan nicaquin aton ranushumuafu ichanancashon David achinonfo. Ascafia David nicain Filisteofo fuaifono

cununhuan cuyacoin muran tarati huayacunashu iquini. ¹⁸Ascan cununhuan cuyacoin muran David iquiano Filisteofoan chaimashta nococanashu machi rafu nushumancaya ahuun anu Refaim ano iquinifo. ¹⁹David ato oinquin nocon Ifo Diosi cufinquin isca huani,

—¿Uhuun Ifon, un natian uhuun ranushumuafu fu un Filisteofo icano un catiromun ato rutushquin? ¿Min noco nichimun min curushhuunshon non ato rutunon? —ishon David nocon Ifo Diosi cufiaintan.

—Ai. Min atoqui catiro. Icocoin un mi fu cai min ato shuhuinon, —ishon nocon Ifo Diosin David cumani.

²⁰Ascan David ahuun ranushumuafu fu Baal-perasim mai ano cani Filisteofo rutui focani. Nococashon ato rutuni. Ascan David yoini, —¡Aicho! Ifo Diosin aca non Filisteofo rutuano faitahuanun samamashta nantifi tara caimatiro cuscan nocon Ifo Diosin nantifi a noिकासमाifo ichoni nocohuunshon Diosin ato rutua. Ascan nuno nan mai non anutiro, “Baal-perasim, Onicoinnin tsainman Diosin atoqui nocoriscashon ato potaran,” —ishon yoinifo.

²¹Filisteofoan ato ahuaara rami huacashon atohuunoa yoiquin isca huamisifo, —Nanfo nocon diosiran, —huamisifo. Ichocaquin nanfo potanifo. Ascan David ahuun ranushumuafu Filisteofo aton dioscoinforma fonifo.

²²Ascafia chipo afanan Filisteo ranushumuafu machi rafu nushumancaya Refaim ano nasonifo. ²³⁻²⁴Ascan afanan David nocon Ifo Diosi cufinquin isca huani, —Ifon, Filisteofo afanan nocofo. ¿Un ahuusca huatiromun? —ishon yocaiton.

—A fusofoquiri ato ointaifin cayamahuun. Ascatamarocon ato tarati huayacucashon ato cachorinoashu ihui

bálsamofu ano yora cahuanai nicatsa nicaí min ranushumuafo yoihuu Filisteofo rutushquin fotanonfo. Un mato tapimai ahuutian man atoqui nocotiro. Ascan ihui bálsamofu camaqui yora cahuanai nicatsacun man atoqui ichotiroquin. Ascan un mato ichomanai cusan urifi mato fu cai, —ishon nocon Ifo Diosin David yoini.

²⁵Nocon Ifo Diosin yononi cusan David yafi Israeli ranushumuafo anifo. Gabaón mai aria chaicoincunoa Gezer mai anoa Israeli ranushumuafoan Filisteo ranushumuafo rutunifo.

**David Jonatán furun
Mefi-boset shara huani**

9 ¹Ascan shafa futsa David ahuun nomuran shinanni isca huaquin, —Un Jonatán yoiyoni ahuun yorafo un shara huashquin. Ascan un natian un futsa yocain Saúl ahuun yorafo futsafo niamun un ato shara huanon, —ishon ahuun nomuran shinanni. ²Ascan David Saúl ahuun oinmati cuna yocashquin. Nococun yocaquin isca huani, —¿Minmun Siba Saúl oinmati ipaoni? —ishon yocani. —Uhuun niaifon, unfin nanquin, —ishon Siba cumani.

³Ascaiton David afanan yocaquin isca huani,

—¿Saúl ahuun yora futsafo niamun? Futsa niicun un nocon Ifo Diosihuunshon un shara huapai, —ishon David yoiaiton. —Ai, Fusti nia. Jonatán facu fusti man nia. Aacai mumama. Ahuun tau rafu chaca. Nipaiqui ranainran, —ishon yoiaiton.

⁴—¿Ranimun? —ishon yocaiton. —Amielpan furun Maquir pushu ano ica. Nan pushu rasi Lodebar ano icaran, —ishon Siba cumani.

⁵Nicatan David futsa nichini Maquir pushu ano Lodebar mai anoshon aqui ihuunon. ⁶Ascan Jonatán ahuun furu

ahuun anu Mefi-boset. Saúl ahuun shota. Davidqui nocoi fasi ratucuin maiqui fuoshopacucahuani a ismashquin David ahuun niaifocun. Ascaiton David yoini, “Mefi-boset,” huaiton. —Unquian min oinmati, —ishon cumaiton. ⁷—Un mia shara huashquin ihuua. Ascan ratuyamahuu. Min upa nataima un yoiyoni “Min yorafo un ato shara huashquinran,” ishon un yoini. Ascan nantifi min shota Saúl ahuun mai ipaoni un mia inain mina inon. Ascan min u fu nuno uhuun pushu muran itiro. Shafatifi min nunoshon u futan pitiroran, —ishon David yoini.

⁸Ascaiton nicaquin maiqui fuoshopacucahuatan Mefi-boset cumani, —Uncai ahuama. Un pashna naa cuscaran. ¿Ascan ahuuscai mian shara huaimun? —ishon yoini.

⁹Asca huafiatan David Saúl oinmati ipaoni Siba yoini isca huaquin, —Un min niaifo ipaoni Saúl yafi ahuun yorafo un nantifi atona ato mai non nantifi ahuun ahuafori un Saúl ahuun shota Mefi-boset inashquin. ¹⁰Ascan min non min facufo non min oinmatifoyashon a mau huashocahuun ahuun yorafo pimasharashqui. Ascafia Mefi-boset nunoshon uhuun pushu anoshon shafatifi u futan piishquinran, —ishon David Siba yononi.

Siba ahuun furu ranan quince icaino ahuun oinmatifo veinte ipaoni. ¹¹Ascan Siba David cumani isca huaquin,

—Ai, niaifon. Mian yoia cusan un nantifi aashquinran, —ishon cumani.

Ascan a fu icain chain Mefi-boset David futan pini. Ahuun facu shinantsa a futan pini. ¹²Mefi-boset ahuun furonanfacu ahuun anu Micaía. Ascan Siba yorafo nantifi Mefi-boset ahuun oinmatifo ini. ¹³Ascan ahuun tau rafu chaca icaino Mefi-boset Maquir pushu

anoashu David pushu Jerusalén pushu rasi ano shucuni shafatifi a futan pifain a fu iishquin.

David yafi shomaya ahuun anu Betsabé

11 ¹Ascan oshu mayo iyamarai junio niaiffoan aton ranushumuafo futan mani futsafo rutui fomisiko. Nantianri David ranushumua niaifo Joab yafi Israel ranushumua futsafori nichini. Ascan Amonitafo rutufain aton pushu rasi uhuapa ahuun anu Rabá iquinifo a murannofo ato ichoshquin Israelifona inon. Ascaifono David Jerusalén ano nituni.

²⁻⁴Yatashtacoin David ahuun racati anoashu funicaini pushu fomancaya sapacoin camaqui cahuancacaini ainfo fasi sharashtacoin nashiaiton oinni. Na ainfo ahuun imishupucumisitian imi shatuano nocon Ifo Diosin Israeli yononi cuscan nashini. David oinshon ahuun oinmati nichini nan ainfohuunoo tapimanon. Ascaino ahuun oinmatinin ainfo icanoashu nasoshon yoini isca huaquin, —Na ainfo ahuun anu Betsabé Eliam facu. Ahuun funu Hitita ahuun anu Uríasran, —ishon yoiaiton David ahuun oinmati cumani isca huaquin, —Betsabé pushu ano catahuun ua ihuushoshquin, —ishon yononi. Ascano aqui nocoashu a fu oshani. Iyoconaino ahuun pushu ano nasoni.

⁵Ascan imimisitian oshu finoanno Betsabé mua man facu nanua. Tapishon David tsain fomani isca huaquin, —Mun facu nanuwan, —ishon yoini. ⁶David tapini nanton facu nanumana. Ascacun ranushumua niaifo Joab cunu fomani isca huaquin, —Nan Hitita Urías ua nichishoriscahuun, —ishon yononi. Ascan Joab Urías David ari nichini. ⁷Nocoshon David yocani isca huaquin, —¿Niaifo Joab sharamun? ¿Ranushumua futsafori sharamun? ¿Nan

Amonitafo aton ranushumuafo nocon caiffoan ato shuhuiamun? —ishon David Urías yocani. ⁸Ascan ahuun tsain anaitishon David Urías yoini isca huaquin, —Natian min pushu ano catahuun tunuyoshquin, —ishon yoini.

Urías caiton chipo David tushu sharacoin fomani piisharanon. ⁹Ascafianocai Urías ahuun pushu ano canima. Niaifo David pushu unmainti ano ahuun oinmatifo osha ano arifi nanno oshani. ¹⁰Ascaino futsan Davidqui chanini, —Niaifon, Urías ahuun pushu ano yamu caama. Nanno oinmatifo osha arifi nanno osharan, —ishon yoini. Ascaino David Urías cunashon yoini,

—Min fasi chaicunoashu oa. ¿Ahuuscai min pushu muran min oshamamun? —ishon David yocaiton.

¹¹—Niaifon, Na casho muran Diospan tsain non Israelifo non Judápan ranushumuafo nan pano pushu muran icafo. Niaifo Joab yafi nocon ranushumua futsafori nanno fasi fununun icafo. ¿Ascan ahuuscai urus fusti natianri uhuun pushu muranshon pisharafain ayasharafain uhuun ahuin fu un icamun? —ishon Urías yoini.

¹²Ascan David Urías yononi isca huaquin,

—Afanan na shafata nuno ihuu. Funamari un mia nichinon, —ishon yoini.

Ascan na shafa yafi iyoconaino Urías Jerusalén ano nituyoni. ¹³Asca huaino nan yata David afanan Urías cuna a futan pinon. Pimatan David shinanni, —Un fasi paumanon Urías ahuun pushu ano caashu ahuin fu oshanon, —ishon shinanni. Asca huafiano ahuun pushu ano catamarocon afanan David oinmatifo osha ano arifi nanno ato fu oshani.

¹⁴Ascan iyoconaino David ranushumua niaifo Joab cunusho

fomani. Nan cunu Urías inanni Joab foshotanon. ¹⁵Nan cunun yoini isca huaquin, —Fasi rutunain finacoiyainfoanno Urías nichihuun. Ascan min ranushumua futsafo yoihuun Urías icano nasoriscanon Urías arus fusti nanno nitunon Amonitafoan a rutunonfo, —ishon cununi.

¹⁶Ascan David yononi cuscan Joab ani. Amonitafo ranushumua mutsisipacoinfo rutumitsaquin tapicoianfoanno Uríasqui nichini.

¹⁷Ascan pushu rasi Rabá mai anoshon Amonita ranushumuafoan ato nichini Joab ranushumuafo rutunon. Ascan Israeli ranushumua futsafo naino nantianri Urías arifi nani.

¹⁸Ascan Israeli ranushumuafo non Amonita ranushumuafo rutunainfo cuscan Joab David nantifi tapimani.

¹⁹Ahuun ranushumua futsa nichiaton yoini isca huaquin, —Nantifi finoanfo cuscan niaifo David yoitacahuun.

²⁰Ascan min anori yoiyaino sinaquiraca mia yocainraca isca huaquin, “¿Ahuuscai man pushu rasi chaimashta foamun? ¿Man tapiamamun nan pushu rasi cunu cuyacoin tarati huaafo? Nan cunu cuyacoincamaquinoashu man chaimashta nocoaiton mato piantirofo. ²¹¿Man shinanmamun nocon shuni Jerobaal facu Abimelec pushu rasi Tebes nocoshon ainfoan cunu cuya camaquishon toquiri uhuapacoin ahuun mapoqui potaquin man rutumanaran?” ishon mia yoiaiton min cumatiro isca huaquin, “Urías arifi man noco yorafo fu naaran,” —ishon yoihuu.

²²Ascan Joab nan ranushumua Davidqui nichini. Nocoshon Joab yoini cuscacoin Davidqui chanini.

²³Yoiquin isca huani, —Nocon noicasmaifoan ichapacoin nocoqui pushu rasi anoashu foafo noco rutushcaquin. Ascaifoan non ato afanan

pushu rasi shoi caincaiti anoshon caimana. ²⁴Nan pushu rasi cunu cuyacoin camaquishon aton ranushumuafoan noco piancafo. Ascaino nocon caifo fusti rasi naino Urías arifi man naaran, —ishon ranushumua David yoini.

²⁵Nicaquin David ranushumua yoini isca huaquin, —Min niaifo Joab ua yoishohuun isca huaquin, “Shinanchacayamahuun.

Rutunainfoancai non tapitiroma ratomain naicai. Ascan afanan pushu rasi ano min ranushumuafo iyotahuun afanan amuranfo cuyoinonfo,” ishon nannori Joab yoihuun ahuun nomuranshon shinansharanon, —ishon David tsain fomamisi yoini.

²⁶Ascan Urías ahuin Betsabé ahuun funu naa nicain fasi uaini. ²⁷Uaiquin unuano David futsa nichini ahuun pushu ano Betsabé ihuunon. Ascan ihuano David fini ahuun ahuin onon. Chipa man furonanfacuya. Ascafia David aca cuscan nocon Ifo Diosin shinansharamanama. Fasi chaca hua.

David chaca huani cuscan Natán a yoini

12 ¹Ascan nocon Ifo Diosin ahuun tsain yويمisi Natán Davidqui nichini yoiquin isca huanon,

—Niaifon, un mia ahuaara yoipai.

Pushu rasi futsa muran nocofunu rafu icafo. Futsa mafo ichapaya icaino futsa ahuuoma ini. ²Nocofunu mafo ichapaya chashoanfo non moifo ichapacoian.

³Ascan nocofunu ahuuoma chashoan facu ahuinshita fustiya. Nan chashoan facushta aya ahuun facufo aya icaifono yosia. Ahuun tushu piifain ahuun cucho ayafain nocofunun chishtoano osha. Ahuun facu cuscaracoin. ⁴Ascan shafa futsa nocofunu ahuaara ichapayano nocofunu futsa ahuun pushu ano chaicunoashu noco. Nan nocofunu

pimashquincai ahuun chashoanfo ichapayafiashtoncai ahuuna futsa rutushopaitama nocofunu ahuuomana chashoanun facu ahuiinshta fianshon rutushona nan nocofunu chaicunoashu oa pimashquin, —ishon Natán yoini.

⁵Ascaiton nicain David nocofunu mafo ichapayaquin fasi aqui sinaquin yoini isca huaquin,

—Ascan nocon Ifo Diosi nicun non icoinra huatiro. Non icoinra huatirori na nocofunun mafo ichapaya futsa ahuuoma chaca huashu naa shara icuana. ⁶Nan chashoan facu fustishtayahuuncai ahuun ramapaima. Ascaiton nan ahua ichapayatun ahuun rafanan chashoan facu ahuuoma inanquin rafu non rafuri huairan, —ishon David Natán yoiaiton.

⁷Natán David cumani, —Minfin nan nocofunu ichapaya. Nonfin Israelifoquin. Nocon Ifo Diosin mia yoi isca huaquin, “Un mia catoan min caifo Israelifoan aton niaifo min inon. Saúl mia rutunonma un mia numamisi. ⁸Saúl pushu yafi ahuun ahuin ranan un mia inan. Israelifo non Judáfoan aton niaifo un mia imani. Nanfo ichapayamacun un mia paratamacoin inan cuana. ⁹¿Ascan ahuuscaquin uhuun tsain ahuaamaran ishon min shinanmun? ¿Ahuuscai min chaca huamun? Min Amonitafohuunshon Urías rutufain ahuun ahuin min fian min ahuin inon. ¹⁰Ascan min Urías nan Hitita ahuun ahuin min fian min ahuin inon. Ascacun nan min chaca huahuunshon min yorafoan shinantiro uhuun tsaincai atona ahuama. Nanscacun min yorafo afi ranan rutunanpacunacafo.

¹¹⁻¹²“Nan min chaca huahuunshon un yonoi min yoracoinfoan mia chaca huanon. Min ahuinfo un min yoracoin inain. Min chaca hua cuscan min fomanpai. Ascafia un shafacafin

futsafoan ointaifin min ahuinfo min yoracoin fu iishquin,” ishon Diosin mia yoi, —Natán David yoini.

¹³Nannori yoiaiton nicaquin David Natán yoini, —Unfin Diosqui chaca huaquin, —ishon yoiaiton.

Natán David cumani isca huaquin, —Nocon Ifo Diosin min chaca hua cuscan mia soashona. Mincai naima.

¹⁴Ascafia min chaca huahuunoa nocon Ifo Diosin nan noicasmaifoan shinantiro acai ahuaamaran ishon yoifain ahuunoa tsain chaca huacani. Ascan min facu rama caian man nairan, —ishon Natán David yoini.

¹⁵Ascan Natán ahuun pushu ano nasoaition chipo Urías ahuin David fian ahuun facu nocon Ifo Diosin fasi isininmani. ¹⁶Ascaiton David nocon Ifo Diosi fasi cufini isca huaquin, —Ifon, uhuun facushta ua caya huashopun naanonma, —ishon cufinquin piqui tunufai yamutifi maitoca racashini.

¹⁷Israeli niaifo patasharinoafu ahuun pushu muran icafoan yoinifo isca huaquin, —Niaifon David, funihuu noco futan piishquin, —ishon yoifiaifono funipaitama ato futaricai piinima.

¹⁸Ascan siete osha finoano facushta naani. David ahuun oinmatifo ratucaquin nan facu naacai David yoinifoma. Ascashu afi ranan yoinancani iscanifo, —Facu nataima David fasi shinancoian. Non yoi ai cuscan noco nicapayama. Ascan natia ahuun facu man naa non yoiaino fasi shinanmitsai finacai.

Shinanmitsacoinquiraca ahuaara chaca huatiro, —icashu yoinannifo.

¹⁹Ascaifoan David ato oinni fashushu yoinainfoan oinquin ahuun nomuran shinanni man facu naa. Ascaifoan oinquin ato yocani,

—¿Uhuun facushta man naamun? —ishon ato yocaiton.

—Ai. Man naaran, —ishon yoinifo.

²⁰Nicain David funinacahuan nashicain shiran icain sahuuti futsa sahuufain Diosi fu tsainti pushu muran iquishon nocon Ifo Diosi cuffifain ahuun Ifo Diosihuunoa yoisharani. Yoiquin anaititan ahuun pushu ano nasoni piishquin. ²¹Ascaiton oincaquin ahuun niaifo patasharinoafon yocani, —Niaifon, min acai cuscacai non tapiama. Min facu nataima min piqui tunufain fasi min uaica. Ascan min facu naano min funishon min piaran, —ishon yoinifo.

²²David ato cumani isca huaquin, —Uhuun facu nataima un shinan, “Uhuun Ifo Diosin uhuun ramapaiquin facu ua nimashotiroraca,” ishon un piqui tunufain un uaica. ²³Ascan natian man naa. ¿Ascan ahuuscai natian un piqui tunuimun? Un piqui tunuahuunshon uhuun facu caya huatiroma. Ratora shafata naashu un aqui nocotirofiacai aafin afanan uqui nasotiromaran, —ishon ato yoini.

Salomón cainni cuscan cununi

²⁴Ascaino David ahuin Betsabé ahuun nomuran facu fasi shinainton David tsain shara yoini afanan omitsiscanonma. Afanan a fu oshashon facu nanumana. Furonanfacu caincun anuni Salomón. Nocon Ifo Diosin nan facuhuun noicoinni. ²⁵Ascan nocon Ifo Diosin ahuun tsain yoimisi Natánhuunshon David yoini isca huaquin, —Ahuun anu futsa Jedidías ishquinran, —ishon yoini. Jedidías Israelifo tsainman nocon Ifo Diosin ahuun noiran, ishon anuni.

David ahuun ranushumuafoya Rabá finifo

²⁶Ascan nantianri Joab futan Israeli ranushumuafoan Amonitafo aton pushu rasi Rabá ano iquinfo. Nanno

Amonitafo aton niaifofo ipaonifo.

Nantifi Amonitafo rutufain ato ichonifo.

²⁷Ascan Joab tsain fomisifo Davidqui nichiano yoiquin isca huani, —Natian un Rabá muran iquishon non Amonitafo rutuquin finonshon Rabá icafoanno a aton unu non fiian. ²⁸Natian ranushumua futsafo ichanan huahuu nuri funonfo. Ascan minfin min nocon ranushumuafo iyotiro Rabá mai ano iquinonfo nocona inon. Min asca huaino nantifi nocon caifo uhuunoa yoitamarocon yoishcani isca huaquin, “David Amonitafo finoncoincashon aton pushu rasi fiaran,” ishon mihuunoa yoisharanonfo, —ishon Joab David tsain fomani.

²⁹Ascano Joab yoia cuscan David ranushumua futsafo ichanan huano a fu Rabá ano fonifo nan iquiafotian Israelifona inon. ³⁰Ascatan David Amonitafo niaifo ahuun maiti pucashon ahuuna inon maimani. Nan maiti orohuunshon oni huani. Toquiri cuscaran sharashta futsa futsatapafo nan maitihuun nuua ini. Ahuun ihuu treinta y cuatro kilos. Rabá mai anoshon David ahuaa sharafo ichapa ahuun mai ano foni.

³¹Rabá icanoafo David yononi Israelifo aton yonomatifo inon. Nisatinin yonofain cuno mai poquitinin yonofain ruratinin yonofain ladrillo huamisiri ini. Nantifi Amonitafo aton pushu rasi icafoannoshon David ato nanscara yonomani. Ascan anaitiafono David yafi Israeli ranushumuafo Jerusalén ano nasonifo.

Nocon Ifo Dioshuunshon David fanainsharashoni

22 ¹Ascan nocon Ifo Diosin David numani Saúl rutunonma. Ascataari nan noicasmaifoanri David rutupaifiainfoan Upa Diosin David numani. Ascacun David nocon Ifo Diosi fanainshoni isca huaqui,

- ² —Uhuun Ifo Diosin min uhuun
cushumisicoincun.
Un miqui ichotiro min ua
cushunon.
Min uhuun numamisi
ahuara chacafoan ato oinmati un
inonma.
- ³ Min uhuun Diosin min uhuun
toquirininhuan cuscaran.
Toquiri uhuapacai tsoan
shucatiroma.
Nanscarifi ai min u fu icanocai
tsoan mia shucatiroma
uqui nocoshon ua chaca
huashquin.
Min uhuun cuno sapaqui pia
iquitiroma cuscaran.
Ascan minhuunshon ua chaca
huapaifiacaquicai
tsoan ua chaca huatiroma.
Min ua numai min
curushhuunoashu un isharanon.
Cunu cuyacoin tarati huashu
tsoa pushu rasi muran iquitiroma
yorafo chaca huashquin.
Nanscarifi ai min uhuun cuno
cuyacoin cuscaran.
Ascacun tsoan ua ahuusca
huatiroma.
Min ua numamisi.
Yora pofufoan ua fasi chaca
huaiton
min ua numa ua ahuusca
huanonfoma.
- ⁴ Ifon, min fasi sharacoincun
un mihuunoa yoipacunaca.
Un mia cufiainton
min ua numamisi ua
noिकासmaifoan
ua ahuusca huanonfoma.
- ⁵ Unuhuan fuchoaino yora asatiro.
Nanscarifiaquin yora chacafoan
ua namapai.
Un fasi ratucoin ua
cuyopaiyaifoanno.
- ⁶ Ua noिकासmaifoan shinanfo
ua samamashta mai huacani.
Un shinanni mun nai.
- ⁷ Ascan un omitsiscaquin
uhuun Ifo un cufini.
Uhuun Diosi un cufinquin isca
huani,
“Uhuun Ifo Diosin ua numapun,”
ishon un yoini.
Ascaiton nan icanoshon ua nicani.
- ⁸ Ascan nocon Ifo Diosin ua
noिकासmafoqui sinaino
mai yafi nai nayanaiyaini.
- ⁹ Ahuun ruchocoonun coinmanhuan
potai cafisca huani
ahuun ashfanpari uru manhuan
potai cafisca huani.
Ascaino chii urumanhuain
cafiscani.
- ¹⁰ Ascan nai murannoashu
fupucumuacucahuanaino
Diosin fotoni.
Coinmanhuan fisocoin rucu oaino
amanaonri Diosin fotoni.
- ¹¹ Ahuun oinmati mutsispacoin a fu
nai muran ica
fototiro cuscan Diosin fotoni.
Puiya uhuapanunhuan fuun
noyamatiro cuscan
Diosin fuuhuan muran fotoni.
- ¹² Coin faquishihuan murannoashu
fotoni.
- ¹³ Asca fotoaino fasi chashacointan
cana fasi piishini.
- ¹⁴ Ahuun oi turuica nicatsa.
Nocon Ifo Diosin tsoancai
finontiroma
fasi oi ashafinin nan ua
noिकासmaifo ato mustaimani.
- ¹⁵ Ahuun piiyan cuscara piiyacaino
ua noिकासmaifo
pashcananfainnifo.
Cana piishicaino ichofoannifo.
- ¹⁶ Ascano nocon Ifo Diosihuunoashu
ashaintanaino

unuhuan nushmancayan
maitsaoriscatani.
Nan mai oni huani cuscari
shafacafi nantifishon ointirofo.
17 Asca huashon afin icanoshon ua
numani.
Un fasi omitsiscaquin un shinan
ua chacahuaifo cuscan un
tunutiroma.
Un unu noacoin muran asai cafisca.
Un ascaiton nocon Ifo Diosin ua
numani.
18 Ua noicasmaifo fasi curushcoinfofia
uncaí ufiri numatiromafia
nocon Ifo Diosin ua numamisi.
19 Uficai un numatiroma.
Ahuara fasi chaca un finoainno
natian ua noicasmaifoan ua
pacumapaicani.
Nantian nocon Ifo Diosin ua ahuun
curush inan
uacai pacumatirofoma.
20 Nocon Ifo Diosin uhuun noicoin
uqui fasi unimai.
Ascan ua numa ua iyoanocai
ua noicasmafo uqui nocoshquima.
21-25 Nocon Ifo Diosin ua tapima cuscan
un huamisi.
Uhuun Diosicai un chaca
huamisima
nanscacuai ua potamisisa.
Noco yononi cuscan un
shinanfafaini.
Ahuun tsain cununi cuscan un
potamisisa.
Diosin ua oin un ahua chaca
shinantama
un ahuun tsain tanacoian.
Nanscacun uhuun nomuran un
ahua shinanchacama oinquin
nocon Ifo Diosin ua ahua shara
huashoshquin.
26 Nocon Ifo Diosin, mia
tanasharamisifo
min atori cushusharashquin.

Nanscarifi ai tsoa nan min yoia
cusca amisi
minrifi min ato yoiyomisi cuscan
min huaashqui.
27 Tsoan ato nomuran shinansharafain
chaca huamisima
nocon Ifo Diosin min ato oinmani
minri shinanshara fustifain min
ahua chaca huamisima.
Ascafia tsoan chaca huamisifin
min ato ismaicain min main
atohuunoa onancoinshon
min ato onaintimashquin.
28 Ascan tsoan ahuunoa fusti
shinantama
futsafohuuri shinansharacoinquin
futsafo finonpaitamarocon
man tapia Diosi fasi yopacoinquin.
Nanscarafo min ato numashquin.
Ascan nan cacapaimisifoan nantifi
finonpaimisifo.
Un tsoa futsa yopaimaran icashon
shinanmisifo.
Ascarafofin min nantififain
ointaifin
min ato ismashquin afocai
ahuama.
29 Uhuun Ifon, min uhuun lampara
cuscaran chashamashquin.
Icon, Ifon, faquish muranri mian
chashamashoshqui.
30 Min curushhuunshon un
ranushumua mani futsafo un
cuyotiro.
Un minhuunoashu cunu cuyacoin
ari inatiro.
31 Ascan Diosin ahua shara fustisi
huai.
Ifon, min yoiyomisi cuscan nantifi
iconcoin.
Tsoan mia yoiquin isca huai,
“Ifon, ua cushusharapun,” ishon
yoiaiton
nan cuno sapaqui pia iquitiroma
cuscan huaquin

- nocon Ifo Diosin ato cushushara.
 Nan noिकासmaifoancai ato
 ahuusca huatiroma.
- ³² Nocon Ifo fustifin Diosiquin.
 Nan fustifin toquirininhuan
 cuscaraquin.
 Tsoan Diosin shucatiroma noco
 cushunonma.
- ³³ Diosifin cunu cuyacoin pushu rasi
 tarati hua cuscaraquin.
 Ahuun curushhuunoashu noco
 noिकासmaifocai nocoqui
 nocotiroma.
 Diosihuunoashu non isharatiro
 noco ahuusca huanonfoma.
- ³⁴ Chasho casharatiro
 machi cuya mamaqui
 nocosharashquin.
 Nanscarifi ai un niyoano
 ahuafo ua nitu huapai
 Diosin ahuun curushhuunshon ua
 mutsismashon
 ua iyopaiyaiquiri pacutamarocon
 un nocosharatiro.
- ³⁵ Ua noिकासmacaquin ua chaca
 huapaiyaifoan
 Diosin ua itisharahua nocofunun
 mutsisipa ahuun cuno piacati
 curushcain un piantiro.
 Nanscarifi ai nocon Ifo Diosin
 ahuun curush ua inain
 ua noिकासmaifo un ato piancaiton
 ua ahuusca huanonfoma.
- ³⁶ Cuno sapa nituhuatikai aqui pia
 iquitiroma.
 Nanscarifi ai mian
 numahuunoashu
 yoshin chaca uhuun nomuran
 iquitiroma ua chaca huashquin.
 Min ua ashomisihuunshon un
 futsafo finoncoian.
- ³⁷ Min ua mau fai huashoan un
 pacunonma.
- ³⁸ Ascano nan ua noिकासmaifo un ato
 ichomana
 ato rutuqui cuyoshquin.
 Un ato cuyoataima un ato
 mufainquin unuama.
 Ascashon un ato cuyocoinni.
³⁹ Un ato cuyocoinshon ato shatuqui
 futsa afanan funinonfoma.
 Uhuun tau naman pacui futsuafo.
⁴⁰ Mian mutsismana ua noिकासmaifo
 ichoshquin.
 Ua noिकासmaifo min ato finoan
 ua ahuusca huanonfoma un ato
 yononon.
⁴¹ Min ato umaquinoa ichoni.
 Nan ua noिकासmaifo nantifi un ato
 cuyoquin futsanon.
⁴² Ua noिकासmaifo cunacani futsan ato
 numanon.
 Ascafiatocai tsoan ato numai
 oama.
 Ascaino nocon Ifo Diosiri
 cunafiaifono
 arificai ato cumanima.
⁴³ Un ato cuyocoiano mai mapo
 ointsa inifo.
 Yoran unmaintinoa mai mapo
 matsotiro cusca huaquin un ato
 potani.
⁴⁴ Uhuun yorafoan uhuunoa tsain
 chaca huafiafo
 min ua numa uhuunoa afanan
 ahua chaca yoinonfoma.
 Mian cushuaino un mani futsafoan
 un aton niaifo ica.
 Un futsafo oinyamafiamisishaquin
 un ato yonoa cuscan
 minhuunshon ua nicasharafo.
⁴⁵ Futsafo uhuun caifoma ratucani
 uqui fuafo.
 Uhuunoa nicai fucani
 un ato yonoai cuscan samamashta
 aashcaquin.
⁴⁶ Samamashta ratucani
 aton cunu cuyacoin muran tarati
 huayacucanashu
 ratucani taritariyanan uqui fuafo.

- ⁴⁷ ¡Ifo Diosin, minfin uhuun
toquirininhuan cuscaran
nipanaca!
Tsoan mia anoa shucatiroma.
Min ua cushupacunaca.
Uhuun Numamisi nocon Ifo Diosin
nantifi finoncoian.
¡Nannori nantifi yoipacupainon!
⁴⁸ Tsoan ua chaca huaifin min ato ua
copishoniquin.
Min curushhuunshon un caifo
futsafo finoan
uhuun yonomati inonfo.
⁴⁹ Ua noicasmacaquin pofufoan
ua chaca huapaiyaifo
nocon Ifo Diosin min ua cushushara
ua ahuusca huanonfoma.
Uhuun Ifon, futsafoanri ua
rutupaifiainfoan
mian numamisi ua rutunonfoma.
⁵⁰ Uhuun Ifon mian shara huamisi.
Ascan un manifoti mihuunoa
yoicai.

- Un ato yoiquin isca huai,
“Uhuun Ifo Diosi fasi sharacoin
ahuamamishti huatiro.
Tsoan uhuun Ifo finontiomaran,”
ishon minhuunoa un ato
yoishquin.
Un mihuunoashu unimacain fanain
sharashquin.
⁵¹ Upa Diosin nonfin min yora
Israelifo.
Mian catonni uhuun caifoan un
aton niaifo inon.
Ascano noco noicasmacaquin noco
rutupaifiainfoan
min curushhuunshon un ato
finoncoian.
Min ua catoan cuscan ua noiquin
unupacunacama.
Ua non uhuun facufo non uhuun
funafori
min noco noiai cuscacai
unupacunacamaran, —ishon
David yoini.